

現代生活藝術系列

華嚴經疏論纂要 71

——十地品之十二

華藏淨宗學會印贈

大方廣佛華嚴經疏論纂要卷第七十一

五臺山清涼國師澄觀疏鈔

太原方山長者李通玄 論

閩鼓山私淑比丘道需纂要

十地品第二十六之十二

○第九善慧地初明大意

〔疏〕所以來者。瑜伽意云。前雖於無相住中捨離功用。亦能於相自在。而未能於異名衆相訓詞差別一切品類宣說法中。得大自在。爲令此分得圓滿。故次有此來。○言善慧者。攝大乘云。由得最勝無

礙智故。無性釋云。謂得最勝四無礙解。無礙解智。於諸智中最爲殊勝。智卽是慧。故名善慧。卽下文。中十種四無礙是也。莊嚴論云。於九地中。四無礙。慧最爲殊勝。云何勝耶。於一刹那。三千世界所有。人天異類。異音異義。問。此菩薩能以一音。答衆。問。徧斷衆疑。故。此同下文。○故所離障。離利他中。不欲行障。有四辨。故。四無礙障。分成二愚。前三爲一。名於無量所說法。無量名。句字。後後慧辨。陀羅尼。自在愚。謂所說法。是義。名。句。字。是法。後後慧辨。是詞。陀羅尼。自在愚。通於上三。一辯才自在愚。卽

愚第四無礙。○故所證真如。名智自在所依。謂若證得此真如已。於無礙解。得自在故。便成善達法器。自在說法行。鈔莊嚴論云。四辨自在。成熟衆生。法行。卽此經善達法器。梁論云。由通上真如。得應身果。金光明中。得智藏三昧。皆一義耳。

論此地何故名爲善慧。爲此第九地行。同十住中第九法王子住。每與五位中第九位。竝同法師位。善知衆法。故名善慧地。

○次正釋文。三分之內。初讚請分。

說此菩薩八地時。如來現大神通力。

震動十方諸國土

無量億數難思議

一切知見無上尊

其身普放大光明

照耀彼諸無量土

悉使衆生獲安樂

疏有十三頌。分三。初二。如來現相。顯說無功用行。

無動之動。難思議故。特此現通。

菩薩無量百千億

俱時踊在虛空住

以過諸天上妙供

供養說中最勝者

疏次十頌別讚。後一頌結請。別讚中亦三。初一。菩

薩供

大自在王自在天

悉共同心喜無量

各以種種衆供具

供養甚深功德海

疏次一天王供

復有天女千萬億

身心歡喜悉充徧

各奏樂音無量種

供養人中大導師

疏後八天女供讚於中二初一供餘七讚

是時衆樂同時奏

百千萬億無量別

悉以善逝威神力

演出妙音而讚歎

疏讚中二初一標讚。

寂靜調柔無垢害

隨所入地善修習

心如虛空詣十方

廣說佛道悟羣生

天上人間一切處

悉現無等妙莊嚴

以從如來功德生

令其見者樂佛智

〔疏〕後六顯詞於中亦初二讚菩薩通於八地及

說法主

不離一刹詣衆土

如月普現照世間

音聲心念悉皆滅

譬猶谷響無不應

若有衆生心下劣

爲彼演說聲聞行

若心明利樂辟支

則爲彼說中乘道

若有慈悲樂饒益

爲說菩薩所行事

若有最勝智慧心

則示如來無上法

譬如幻師作衆事

種種形相皆非實

菩薩幻智亦如是

雖現一切離有無

[疏]後四雙讚佛及菩薩三輪化益此文云菩薩幻

智後結云讚佛已故文中通讚八九地如月普現

前地有故此法師位隨機說權實故鈔如月普現者偈云譬如

日月住虛空一切水中皆現影任於法界無所動隨心現影亦復然從此法師下卽九地之德下文

廣具文中三初一身無心而普應次二口隨機而演

說後一喻結心常契中旣特云最勝智心示如來

法權實明矣故纓絡經中說十種善前九依三乘

人各成三乘第十名佛乘種性謂初聞佛法卽發

佛心唯觀如如。修佛智慧終不爲悲願纏心。一向不起二乘作意。第九爲悲願纏心。故此云。慈悲樂饒益。明文若斯。云何不信。

如是美音千萬種

歌讚佛已默然住

解脫月言令衆淨

願說九地所行道

疏結請可知

○第二正說分。先明地行。文有四分。一法師方便成就。謂此地能起辯才說法。名法師地。趣地行立名方便故。二智成就。具能知法之智慧故。三入行成就。達所化器之心。行故。四說成就。稱根

正授故。四中初一入心。餘皆任心。亦攝三位。至下當知。然第八地中。但淨佛土。教化衆生。此地辯才力故。教化衆生。成就一切相。能教化故。一切相者。具上四分故。初分中三。初牒前起後。前得二諦等智故。次正顯方便。三結行入地。今初。爾時金剛藏菩薩。告解脫月菩薩言。佛子。菩薩摩訶薩。以如是無量智思量觀察。

○二正顯方便

欲更求轉勝寂滅解脫。復修習如來智慧。入如來祕密法。觀察不思議大智性。淨諸陀羅尼三昧門。具廣

大神通。入差別世界。修力無畏不共法。隨諸佛轉法輪。不捨大悲本願力。得入菩薩第九善慧地。

〔疏〕文有十句。不離二利論云。一五三句示現者。初句利他。次句自利。故云一一。次五利他。後三自利。故云五三。示現之言。通上四段。初句依無色得解脫。想可化衆生。利益他故。化其令得大般涅槃。故云轉勝。論主謂菩薩不求自滅。故作此釋。然經旣云更求寂滅。何妨自求。以七八九地。同得無生。八地得忍。寂滅現前。依勸起修。此求上品。名爲轉勝。卽用而寂。真解脫故。若依此義。前一自利。亦可。

十句。俱通二利於理無失。且依論解。二依未得究竟自利益故。復修習如來智慧。三依根熟菩薩。化入如來秘密。三密化益故。四依邪念修行可化衆生。令觀察不思議智。得正念故。謂觀無念。見智性故。五依未知法衆生轉法輪。令得知故。卽淨陀羅尼。三昧門。皆說法所依故。六依邪歸依衆生。具廣大神通。令入正法故。七依信生天衆生。令入差別世界佛淨土故。上五中。一無證。二無行。三無解。後二無信。下三自利中。八依正覺內證智德。故修力等。九依轉法輪外化恩德。十依無住涅槃斷德。三

得入下。結行入地。可知。一法師方便成就竟

論以如是無量智慧思量觀察。欲更求轉勝寂滅
解脫者。明第八地。入理智無功。趣八升進如來佛
果十力四無畏大用寂滅無功用故。復修習如來
智慧者。明修八九地。於佛功用未自在故。入如來
秘密法者。過思量修習所知。而不作念。普應萬有。
無休息故。觀察不思議大智性者。是根本。普光明
大智也。性者。明智體也。性無依住。對根物而成大
用故。淨諸陀羅尼三昧門者。以無依住智。普應物
而成大用。是正受總持義故。具大神通者。智隨根

應名之爲神。不往而體徧十方。名之爲通。已下如
文自明。已上是修第九地向。

○第二智成就。此下二三段。攝王子住。知法知根。
皆法王軌度等故。且依智成。

佛子。菩薩摩訶薩住此善慧地。如實知善不善無記
法。行有漏無漏法。行世間出世間法。行思議不思議
法。行定不定法。行聲聞獨覺法。行菩薩行法。行如來
地法。行有爲法。行無爲法。行。

〔疏〕文中初總知三性。謂淨染不二。不二卽無記。鈔
一二卽無記者。不同前二。故云不二。淨卽是
善。順理清升故。染卽不善。違理離穢故。後有漏

下。展轉別開。一於淨法。開漏無漏。謂施戒等取相。心修。與漏相應。名爲有漏。無漏反此。二於無漏。開出見道已前名世。見道已去。名出世。三卽就上二世出世異。名爲思議。卽世出世。名不思議。亦可於出世中。約教證二道。四彼有漏思議中。定能證入。名之爲定。爲緣所動。名之不定。亦可佛性定有餘。一切法皆悉不定。四彼有漏者。以思議通於二義。今明定能證入。意取地前思議。故兼取有漏之善。言定能證入者。大乘之中。種性堅固。名之爲定。爲緣所動。名爲不定。故仁王受持品云。習忍已前。十善菩薩。有退有進。譬如輕毛。隨風東西。是諸菩薩。亦復如是。雖以十千劫行十正道。發二菩提心。乃入習忍。亦常學三伏忍法。而不可定。名是不定。人是定人者。入生空位。聖人性故。

必不起五逆十重等。若通諸乘說。五總上諸善。開小乘忍心已去名定。餘必不定。

出三乘。謂諦緣度等。皆通上四。故唯佛果一。是唯

無漏等。而屬菩薩乘果。五總上者。三乘皆有。有漏無漏。世及出世。教證二道。

定不定等。故云皆通。六於三乘法中。示有為無為。依順行故。

此是善體。故後明之。謂滅諦緣性。彼岸真理。皆名

無為。道諦緣智。能證修起。皆名有為。如來一切皆

是無為。佛智有為。非極說故。涅槃令覆有為相。故

三乘聖人。依此起行。依此差別。故名順行。三乘聖人下。釋

上論文。依順行言。然有二意。一依起行。二亦依無為成差別位。二智成就竟。

○第三明入行成就於中三。初總標章門。二依章

廣釋。三總結安住。今初

此菩薩以如是智慧。如實知衆生心稠林。煩惱稠林。業稠林。根稠林。解稠林。性稠林。樂欲稠林。隨眠稠林。受生稠林。習氣相續稠林。三聚差別稠林。

〔疏〕有十一林。一衆生心者。是總。故論云。依其。以通是下十染淨。其依故。菩薩依此而知。故名爲依。下依義準之餘。十是別。不出三雜染。故論云。依煩惱。業。生。生。是苦果。今當第九論釋。餘七云。依其染。煩惱染淨等。依定不定時。謂次根等四。同是業。故名其。隨眠。卽煩惱種。名染。眠伏藏識。令心染污。故受。

生卽生如前已說。餘二通三。故不出三也。二云何通。謂習氣無別體。是染淨等氣分故。三聚但是約時定不定故。鈔上論七林。總有四節。一依其字。攝煩惱染淨等。卽習氣林。四依定不定時。卽三聚林。四節皆合有其依字。初一後一有依。中二畧無以初依字。該於中二。若具應云。依其依染。依煩惱染淨。依定不定時也。二云何通下。二別釋二林。此句微問。後謂習氣下釋。十皆名稠林者。多故名林。難知曰稠。論經十林。皆有行字。謂不正信義。故名心行等稠林。心行若絕。證信圓。非稠林行。然此十名。多如發心品辨。而習氣一。通於二義。一者殘習。二者種子熏習。如下當辨。

論經云。此菩薩以如是智慧。如實知衆生心稠林者。總舉煩惱廣多如稠林。皆由心起。無心卽諸行稠林滅。大智如林。能普覆護一切衆生故。煩惱稠林者。迷法界自性緣生。成等虛空界世界微塵數一切煩惱稠林。明煩惱廣多。翳障如稠林。一達智境。便爲萬行功德稠林。故業根解。種性樂欲。並可知。

○第二依章廣釋。文分九段。以解性欲。合一例故。今初心稠林。

此菩薩如實知衆生心種種相。所謂雜起相。速轉相。

壞不壞相。無形質相。無邊際相。清淨相。垢無垢相。縛不縛相。幻所作相。隨諸趣生相。如是百千萬億乃至無量。皆如實知。

〔疏〕文三。謂總別結別中畧舉十門。攝之爲八。二三

後二合故。一差別相。心意及識六種別故。此八緣

境。許得齊起。故名雜起。又雜起者。必與所俱極少。

猶有徧行五故。鈔第八名心第七名意前六名識。二速轉下二句。

明行相。四相遷流故。速卽是住。住體輕危。速就異

故。轉者是異。壞卽是滅。不壞是生。故論經但一句。

云輕轉生不生相。論云。住異生滅行故。論云。住異者。住釋上。

輕異釋上轉。生釋於生滅釋不生。三無形質者。第一義相。觀彼心

離心故。云何離。謂心身不可得故。身者。體依聚義。

卽同起信心。體離念等。四無邊際。卽自相。順行無

量境界取故。取境不同。故名爲自。取境不同者。此

境有同有異。前五轉識緣五塵境。是現量故。第六意識緣一切法。通三量故。第七末那緣賴耶爲境。是非量故。第八賴耶緣於三境。謂種子。上四相初

根身器世間故。亦現量攝。廣如唯識。一是所相。二是能相。此二竝心之相。二是心之空

性。性相不同。合爲心體。四卽心用。此四竝通染淨。

後四明淨心隨緣。由第五隨煩惱緣成六七。隨業

生緣成第八。謂第五清淨者。自性不染相。卽自覺

聖智真妄所依。不空性也。染而不染。名自性淨。次
下二句。卽不染而染。謂六垢無垢者。卽同煩惱不
同煩惱相。隨緣有垢。性恆離故。七縛不縛者。同使
不同使相。義不異前。但種現有別耳。八有二句。同
名因相。隨因受生故。菩薩以幻智願力生故。餘衆
生隨業諸趣生故。隨因受生相。通釋二句。菩薩以
下。別釋二句。幻所作相。同於摩
即大願
智幻耳

○第二釋煩惱稠林

又知諸煩惱種種相。所謂久遠隨行相。無邊引起相。
俱生不捨相。眠起一義相。與心相應不相應相。隨趣

受生而住相。三界差別相。愛見癡慢如箭深入過患相。三業因緣不絕相。略說乃至八萬四千。皆如實知。

〔疏〕亦三。別中九句。攝為三種事。後七合故。鈔攝為三種事

者。一即遠入相。二難知相。三染相。一遠入相。乃至有頂故。此約四

住現行久者。無始常隨故。明分齊深。至於有頂故。四任揀於無始無明。現

惑揀。種故。二無邊引起者。難知相。言無邊者。修習無量

善根故。引起者。引起惑故。惑與善俱。所以難知。即

勝鬘中。恆河沙等上煩惱也。上。明豎深。此辨橫廣。

無邊引起者。論云。二難知無量善根等修業行故。餘如疏釋。言恆河沙等上煩惱者。以善無邊。一善

上。皆有煩惱故。亦即所知未盡。則無法之上而無惑也。三俱生下七句。合為

染相卽三雜染。謂此煩惱亦與業生。二俱起故卽分爲三。初三句當體明煩惱染。一俱生不離者。明隨所縛。此句總明能所。所縛卽妄心。謂惑與妄心。遮共同事。故云俱生。生卽是事。然離惑不名妄心。離心惑依何住。故迭共相依。名爲不捨。二眠起一義者。是以何縛。謂使爲能縛。使卽隨眠起卽現行。現行由使不得解脫。以現及種同一惑義故。然下辨使不必與現行俱。此中現行必由於使。如有種子。未必有芽。若已有芽。必依種子。故云一義。二與心相應不相應者。是所縛事。事卽真心。若被妄染。

名與相應。是縛非解。心性淨故。名不相應。示可解脫。二隨趣下。有二句。約生。明煩惱染。論云。身事生道界。因故者。苦報集起。名身事生。上句是道。因。下句是界。因。隨趣下。謂就生雜染中。明於煩惱。先舉論總釋。從苦報下。釋論從上句。下。以經對論。道界。因。道界。因。言彰惑之過。三。愛見下。二句。約業。明煩惱染。初句。明於三分中。業。因。障。解脫。故。言三分者。愛。是欲求中。追求現報。受欲行者。見是邪。梵。行。求。癡。是欲求中。追求現報。習惡行者。故論云。無戒衆生。爲現少樂。習衆惡。行。愚癡之甚。慢通上三。而多屬見。有求屬生。染所攝。故此畧無上三。俱障解脫。過患。

難拔。如箭入木。故外道得非想定。尙與見慢相應。上卽論意。亦可見變等通七識中煩惱。故云深入。下句明此惑隨順世間身口意業。不斷起因。故結甲八萬四千煩惱。隨好品自明。

○第三釋業稠林

又知諸業種種相。所謂善不善無記相。有表示無表示相。與心同生不離相。因自性剎那壞而次第集果不失相。有報無報相。受黑黑等衆報相。如田無量相。凡聖差別相。現受生受後受相。乘非乘定不定相。略說乃至八萬四千。皆如實知。

[疏]文亦二別中十句。爲九種差別。後二合故。初一
 道因差別。謂通說三性爲六趣因。引業唯善惡。各
 有三品。二地已說。滿業通三性。名言熏習。亦通三
 性。許爲種因故。鈔引業唯善惡者。俱舍業品云。一業引一生。多業能圓滿。釋云。引業謂總報業。但由一業。唯引一生。若許一業能引多生。時分定業。應成雜亂。若此一生多業。所引應衆同分。分分差別。以業果別故。注云。分分差別者。謂數數成生。多業能圓滿者。別報業也。謂一生成身。圓滿莊嚴。許由多業。譬如畫師。先以一色圖其形狀。後填衆彩。一色圖形。喻引業。一故。後填衆彩。喻滿業多。是故雖同稟人身。於其中間。有支體色力。莊嚴缺減。滿業通三性者。唯識第八云。然諸習氣。總有三種。一名言習氣。謂有爲法。各別親種。二我執習氣。三有支習氣。下二習氣。六地廣明。其名言習氣。問明已釋。爲明三性。故復重舉。論釋名言習氣云。名言有二。一表義名言。卽能詮義音聲差別。一

顯境名言。卽能了境。心。心。所法。隨二名言所熏成。種。作有爲法。各別因緣。彼疏釋云。名言熏習。卽三性法。各自親種。表義名言。卽能詮義。音聲差別者。揀無詮聲。彼非名故。然名乃是聲上屈曲。唯無記性不能熏成。色心等種。然因名起種。名名言種。謂因於名。令心了知。而成種。故今經從因起之義。乃顯境名言。故云許爲因種。

論經云。又知業種種相者。都言之也。所謂善不善。無記。善不善可知。無記者。有二種。一不記善不善。及昏沉睡眠。是不善無記。二三昧正受。心境俱亡。正智現前。但爲衆生轉正法輪。於其自他。無法可記。故云無記相。

疏二有表示等者。自性差別。然論經此句云。作未

作相。此則竝以思爲自性。故論云。此有二種。一籌量時。此在意地。唯有審慮一種思。故釋未作義。二作業時。釋經作字。有決定思。若在身語。唯發動思。成唯識云。動身之思。名爲身業。發語之思。名爲語業。然今旣云有表示等。卽表無表業。各通三業。表則三皆是思。無表則非心非色。或說色收義如別說。鈔云。自性者。造作之義。是業自性。論初釋中。但云。自性差別。然今旣云下。但順經文。而非論意。表卽表彰。相可見故。無表反此。俱舍業品偈云。此身語二業。俱表無表。性釋曰。論釋此二。其文繁廣。今當畧示。初立有宗正理云。身表許別形。故形爲身表。如合掌等。許有別形。形卽是表。善惡故。表卽是業。此之形色。依身起。故名爲身業。次破正量部云。非行動爲體。行動卽是有爲。有爲利那。後有

盡故。此之滅法更不待因。身表是果。果必待因。故論主。次復被有宗云。形色亦非實。有應二根取。謂依多顯。是眼境。形可身取。今顯即形。應二根取。形雖實顯。而非是業。業是思。故依身行門。故名身業。次是表。而非是業。業是思。故依身行門。故名身業。次立語云。語表許言聲。謂且許之。以其言聲爲語業。體業體亦以發語之思。以爲語業。語門行故。語之業。故則分同大乘。言無表者。俱舍云。無表雖以色爲其性。如有表業。而非表示。令他了知。故名無表。又頌云。亂心無心等。隨流淨不淨。大種所造。故由此說無表。然上依小乘。唯識論示正義云。然心爲因。令識所變。示色等相。生滅相續。轉趣餘方。似有動作。表示心。故假名身表。然因心。故識變。似聲生滅。相續。似有表示。假名語業。釋曰。唯識但約心變。卽異小乘。次明無表云。表旣不實。無表寧真。然依思願善惡分限。假立無表。理亦無違。次約大小二乘對辨。然俱舍意。唯身語二具。表無表字。而唯識意。無表旣依表上假立。是故疏云。表則二皆是思。若以非色非心而爲無表。則意亦有矣。故瑜伽五十三云。云何表業。畧有三種。一染污。二善。三無記。若

於身語意十不善業道。不離現行增上力故。有身語表業。名染污表業。所治三也。若即於彼誓受遠離所有身語表。名善表業。此身語善表也。若諸威儀路工巧處。一分所有身語表業。名無記表業。此身語無記表業。若有不欲表示於他。唯自起心內言思擇。不說語言。但發善染污無記法現行。意表業。名意業。釋曰。此顯意業。亦具三性。自能曉了。我今造作如是事業。別表於後。意俱之表。名爲意表。意爲無表。如理思之。故知大乘三皆有表。廣如別章。

論有表示無表示相者。明有表業者。或有業。因有表示生。即因有前境。可見聞覺知。由心取彼。以成業種。或有業種外無表示。由心橫念。自計成業相。**疏**三與心同生不離者。方便差別心共生熏心。不別生果。故謂此業思與等起意識共生。隨其善惡。

生已卽熏本識成名言等種種似能熏故云不別
生果卽不離義。鈔方便心業者。心爲起業之方便
舍頌云。等起有二種。因及緣利那。如次第應知名
轉名隨轉引論解釋已如六地。然今此中。正同緣
等起也。與所起業同利那故。云意識共生。言隨
其善惡生已卽熏成名言等種者。此文影畧。若善
惡熏卽成業種。意識等熏成名言種。由上意識共
生故。然要由業熏心方成種。故云爾耳。疏中等言
等於業種。言種似能熏。亦有二義。一似善惡。惡生
苦果。善生樂果。二似名言。所熏第八。成異熟種。能
熏七識等。成名色等種。上二並言不別生果。言卽
不離義者。結歸於經。謂業
種不離心。得果不離種也。

論與心同生不離相者。明業由心起。心卽是業。如
鏡中像。業所報果。是心影像。心亡境亡。

〔疏〕四因自性等者。盡集果差別。謂無始業因。以是有爲故。自性刹那壞。故云盡。此顯非常。而得持至果。功不敗亡。故云集果不失。此顯非斷。前念雖滅。後念續存。故云次第。亦是因卽頓熏。果則次第。如識等五也。〔鈔〕前念雖滅下。釋經次序之言。然有二意。一卽就上因滅。果生以明次第。二亦是因卽頓熏下。唯就果中。以明次第。如六地明。

〔論〕因自性刹那壞。而次第集果不失相者。明作業由迷自性。雖作妄業。忽起還亡。雖不常繫在前。所集果報。一一不失。自非正智現前。諸業便爲智用。未可脫也。

〔疏〕五有報無報者。論云已受果未受果差別。過去生報業。現在已受。名爲有報。後報未受。名爲無報。非謂全無。更有一理。謂已悔之業。則許無報。有報可知。鈔論云等者。此句明業得報遲速。言過去生世受。更是前前所造之業。且約一相。隨近以明。若今爲已受。是則後報之業。已潤有報。未潤無報。亦應云。已熟已受。未熟未受。更有一理者。上是六地緣生中。護外三過中。此通業無報難。上論答曰。業有三義。故不受報。未造。二未潤。三得對治。前卽第二義。今卽第三。未造之業。卽前無作是也。

〔論〕有報無報相者。三界衆生。及二乘并淨土菩薩。皆是有報相。唯一乘佛果。染淨心亡。不依果報。但爲隨衆生樂欲。隨物現形。似如意摩尼。與物同色。

無自性。無他性。爲本來與一切衆生同其一心。任彼心所見。達者法自如是。非作用往來故。

〔疏〕六黑黑等衆報者。對差別。謂四業相對。成差別故。初二黑白相對。後二漏無漏相對。言黑黑者。卽四中。初一因果俱惡故。又因果俱與無明相應故。卽三塗業等者。等於餘三。謂二名白白業。因果俱善故。俱與智明相應故。卽色界善業。三黑白業。卽欲界善業。因中善惡雜故。受報亦變非變雜。四非黑非白業。謂諸無漏業。無異熟故。對上黑白二業。立雙非名。言衆報相者。上三有報故。論云業集成。

就故若俱舍意其黑白業約相續說以無一業及
一異熟是黑亦白互相違故言相續者謂或意樂
黑方便白如為誑他行敬事等或意樂白方便黑
如慙弟子現麤語等若以義推正以諂心而行敬
事亦可同時餘廣如雜集第八俱舍十六鈔初二
論對字然其論經具有四句云黑業白業黑業白業
非黑非白業論釋云黑業對白業對黑不黑不
白對二業二業卽是第二黑白業也後七如田無
量者因緣差別謂識種爲因業田爲緣隨田高下
等殊令種亦多差別故論經云業田無量相因緣
差別
者彰業能爲緣容因種故隨田高下者上句單約
喻下句雙合法喻又云令種差別者且約喻明如

穀子隨田肥瘦。非令種穀而生豆芽。若約江南爲
橋。江北爲根。則亦少有變種之義。然名流類非全
差別也。若約法說。識種無異。由業善惡。識招苦樂。卽令種異也。八凡聖差別者。卽
已集未集差別。出世未集。世已集故。出世等者。約
法故。以釋經文。凡聖差別故。九十二句。定不定差別。前句明三
種時報定不定。謂現作現得報。名現受現作。次來
生獲報。名生受現作。第三生去。方得報。名後受。然
三受畧說有三因。一由於因。如於佛僧。慈定滅定。
及無諍定。見修道出。作供養者。得現樂報。於父母
王等作損惱業。得現苦報。二由業體。如不動業。得
樂生報。五無間業。得苦生報。三由行願。多福之人。
罪得生報。現世輕受。疾得苦提。多罪之人。都無
現報。以造重惡。趣生報。故諸相好業。皆得後報。不
可一生。卽成佛。故又諸輪王。多受後報。劫滅修因。劫增受果。故第十句。明乘非乘。

定不定乘。卽三乘唯修自乘業名定。乍修此乘復
修彼乘名爲不定。非乘謂世間無運出義故。定者
難度。不定易度故。定者下。此約非乘及與二乘各
於自分已定。大乘若定。更不須
度。是故不言
定者易度。結中亦言八萬四千者。惑因旣爾。所
起之業亦然。根等諸門皆成八萬。翻此卽顯波羅
密門三昧門等。根等諸門者。由惑有業。惑有階降。
業亦如之。或依根有勝劣。性有差
異。解有淺深。欲有輕重。各成八萬。言翻此卽顯等
者下。明能治。一惑等。皆到彼岸。窮理盡性。卽是
八萬四千度門。若於惑等寂妄不動。卽是八萬四
千三昧。若於惑等一一無羈。卽八萬四千解脫。

○第四釋根稠林

又知諸根輒中勝相。先際後際差別無差別相。上中

下相煩惱俱生不相離相。乘非乘定不定相。淳熟調柔相。隨根綱輕轉壞相。增上無能壞相。退不退差別相。遠隨共生不同相。略說乃至八萬四千。皆如實知。

〔疏〕於中二。先別後結。別中十相。為九差別。一說器

差別。謂說法所授之器。信等五根。有下中上故。亦

是鈍中利。謂於教理。受有遲速及多少故。鈔受有遲速者

鈍者遲少利者速多。中者水鴈之間淺深亦爾。一根轉差別。過未為先後

際。現在已定。兩望論差。謂前上中下根。於三際中。

互望轉變。若後轉為中上。前根則下。後轉為下。前

根則增。是差別義。不轉則平。是無差別。三三性差

別。謂約菩薩等三乘根性相形。爲上中下故。不同

第一通於三乘。三乘根性者。小乘爲下。緣覺爲中。大乘爲上。亦猶羊鹿牛形之大小。

也。四煩惱染差別。謂喜樂等五受根。隨貪等煩惱

得增上故。謂喜樂者。喜樂生於貪。憂苦生於瞋。捨

名煩惱。五六二相。明定不定差別。初句乘非乘皆

約熟不熟。明大乘中熟者定。不熟者不定。小乘中

熟者不定。可轉向大乘故。不熟者定。各隨自乘而

解脫故。若世間非乘。熟者不定。可化入道故。不熟

者。報已定故。且慙捨之。卽離世間中。待時方化清

淨捨也。後句淳熟調柔。一向是定。大乘中者。前章約業。明定不定。

今此約根。居然自別。又前定不定。明難易度。今此約熟。明定不定耳。卽離世間者。彼有十種清淨捨。然有二類待時。今皆當之。一以第四云。於法器衆生待時而化。於無法器。亦不生嫌清淨捨。釋曰。今但用法器待時。二第九捨云。或有衆生根已成熟。發生慧念。而未能知最上之法。待時而化。清淨捨。今全用之。是以六隨根網輕轉壞者。順行差別。此疏云。且暨捨之。

知眼等根順行境界。得增上故。於中有三種順行。一依身順行。謂六入展轉。迭共相縛。如網魚鳥。不得解脫。故云根網。此行內境。二生滅順行。謂體是有爲。生住不久。故云輕。易可異滅。故云轉壞。三觀行。取相順行。此行外境。卽論經云。取相。今文闕此。或網中收。

一依身者。此論語倒。云身依順何行。今疏正用。謂六入者。如意識徧緣於六根。

中。根法隨識亦行六中。眼見自身耳聞自聲。聲身
 並在內根所攝。由根隨識緣於眼根。令根被縛不
 得解脫。餘例可知。故云展轉二生滅順行。此言是
 倒。若正應云順行。生滅根與心王相隨染汚。故順
 生滅。易可異滅者。以生住釋輕。以異釋轉。以滅釋
 壞。三觀行順行者。以覺觀心行六塵。故或根網中
 收者。六根取於六塵。根網塵也。六塵引。七聲聞淨
 於六根。塵網根也。故其根網攝論取相。

差別望凡夫。二乘行增上故。以二乘根由滅障能
成。故煩惱無能壞。

七聲聞淨下。下二約人。今初聲
 聞。言望凡夫。二乘行增上故者。

然論下重釋云。聲聞淨者。行增上。滅障能成故。今
 疏取論釋經。此上釋增上。謂二乘淨相對望凡夫。

不求涅槃。今能求故。故於出世得增上也。從
 以二乘根下。釋無能壞。兼釋論中滅障能成。

八菩薩淨差別。此通三種退不退也。

八菩薩淨者。即大
 乘根三不退。大者

即位證。九遠隨等者。示一切根攝差別。謂三無漏
 念也。

根總攝諸根。三者一始行。卽未知當知根。二方便。卽已知根。正在修道。故名方便。三報熟者。卽具知根。謂前信等。共三無漏根生。而隨優劣三位不同。自始至末。故名遠隨。此之三根。於修無學涅槃得增上故。從謂三無漏下。疏釋論文。初修爲始。正行善巧爲方便。究竟名報熟。配三無漏義。見上文。謂前信等下。以論會經釋不同遠隨之言。其信等共三無漏根。釋其生義。根與法行相應起。故而隨已下。釋不同義。自始至末下。釋遠隨義。此之三根下。釋成根義。以勝用光顯增上名根。此上九中。初二約信等。三五七八。竝約三乘。通於諸根。四約五受。六約眼等。九約三無漏根。二十二根。已明十九男女命根不足。可辨餘如俱舍根品。麤

說卽然。細分無量。故結云。乃至八萬四千。

○第五例三稠林

又知諸解。軟中上。諸性。軟中上。樂欲。軟中上。皆略說。乃至八萬四千。

〔疏〕三稠林。謂解性欲。此三與根性相順入。舉一可

反三隅。故皆畧例。鈔然解性欲三畧如十力章。廣

依根生解。依解成性。依性起欲。皆悉相似。名為相順。義理相參。名為順入。以此例根。更不廣說。

○第六釋隨眠稠林

又知諸隨眠種種相。所謂與深心共生相。與心共生相。心相應不相應差別相。久遠隨行相。無始不拔相。

與一切禪定解脫三昧三摩鉢底神通相違相。三界相續受生繫縛相。令無邊心相續現起相。開諸處門相。堅實難治相。地處成就。不成就相。唯以聖道拔出相。

[疏]先總後別。總中晉及論經皆名爲使。論云。隨順逐縛義故。如世公使。隨逐衆生。得便繫縛。卽是隨眠。眠伏藏識。隨逐纏繞故。此唯約種不同。小宗別有十二句。論攝爲二。前六明何處隨逐。後六明以何隨逐。今初爲五。一合初二句。約心明處。初句於報心隨逐。正顯眠伏藏識。卽久安眠處。而言淡者。

無始來有微細難知故。下句於非報心隨逐。卽轉
識分別事識。不離現事而生。故但云心。卽躉廻轉
處。鈔今初爲五者。一約心明處。二就果明處。三就
位明處。四就時明處。五約行明處。今初言報心
者。異熟賴耶總報體故。微細等義。頻見上文。不離
現事者。故唯識等名。前七識爲異熟生。非是報體
酬昔心種。不得名報。而七識皆依第八。託緣現起
名不離現事。種隨現起。或有或無。名躉廻轉處。如
人假寐。不。二相應不相應者。約三界明處。唯與當
界心相應。不與異界心相應故。三久遠隨行相者。
約地明處。論云。隨順乃至有頂故。然有頂之言。通
有二義。一至金剛之頂。二至三有之頂。今取通大
小義。直云有頂。論經但云遠入。今云久遠。亦無始

來。上至九地頂故。九地之言。亦通二義。對上三有之頂。卽三界九地之九。謂欲界。四禪。四空。應爲九耳。若順後義。四無始不拔相。此卽善慧地。第十當其斷盡位故。約時明處。處旣無邊。時亦無始。唯智能怖隨眠。寃賊。旣未曾有。聞思修智。故不能拔出。五與一切禪定等者。此約行明處。由隨眠隨逐。令世間禪定等不能滅。愛見等心。不能隨順。正修行故。名爲相違。故下偈云。禪定境排仍退轉也。後三界下。明以何隨逐。卽顯隨逐之相。由此相故名爲隨眠。此有六種。一於上三有不斷隨逐。所以三有不斷。相似相續者。由有此使作繫縛故。如世眠者不能起牀。後三

界下。明以何隨逐中。除第四句。彰隨眠體虛。餘五亦就前處以明隨逐。而文不次。一卽就前第二約界明處以明隨逐不。二遠時隨逐。卽於上無始時斷。卽是隨逐之相。三開諸處門者。一身生隨逐。謂於前令無邊心相續現起相。三開諸處門者。一身生隨逐。謂於前令無邊心相續現起無邊。如世眠者。夢心相續。以辨隨逐。卽經

一身之上報非報心。明隨逐也。如世眠者。夢中見聞於中二義。一令眼等諸根門集生六種識時。使與同生。故云開門。此明外逐方便心。二論云。及阿賴耶熏故。此明內熏報心。論經門字下。更有集字。卽阿賴耶集起之心。然是諸處通依故。今經義含耳。三開處門。卽於第一約心明處。以辨隨逐集生六識。卽隨逐相。餘如疏文。但言今經義含者。諸

處之中。意處攝賴耶故。四堅實難治。卽不實隨逐。謂修禪等

時。不得真實對治故。不實堅實如世重眠。不得重

觸大聲。無由起故。四堅實下。彰隨眠體虛不就前處。五地處等者。

微細隨逐。此於上有頂處九地中。六入處煩惱身

隨逐故。然九地有二義。一約三界九地。雖竝成就。

細故不知。成處多少。名不成就。如世眠者。夢中謂

覺。二以善慧爲九地。十地猶有。故名微細。不成就

者。此地中分有斷除故。故下偈云。金剛道滅方罪

竟故。五地處者。五卽就前第三約位明處以辨隨逐。言九地中六入處者。以論經云。地入隨順

不隨順相論釋云。九地中六入處煩惱身隨逐故。釋曰。身卽體也。然九地下。是疏釋論。對二有頂存

二九地二約善慧九地中。就所知障種。十地猶有等覺二愚。從入地來。地地雙斷。故於九地已斷。十入故云。此地分有斷除。次引金剛方畢。竟雙證上二。金剛方畢。明十地猶有。既言方畢。明九已有除。又約煩惱障種。金剛頓斷。亦成於經地地之中。皆有成就義。六離苦隨逐。謂唯

無分。別智出世間聖道。方能拔出。如眠得觸。六離

逐者。此就前第五約行明處辨隨逐義。唯以出世聖道方能離者。則反顯世間之道。諸定等不能離也。故論云。餘行不能離。故此以不能離。卽隨逐相。前第五中。以有成就爲隨逐相。

○第七釋受生稠林

又知受生種種相。所謂隨業受生相。六趣差別相。有色無色差別相。有想無想差別相。業爲田。愛水潤。無明暗覆識爲種子。生後有芽相。名色俱生。不相離相。

癡愛希求續有相。欲受欲生無始樂著相。妄謂出三界貪求相。

疏受生稠林於中十句先總後別論通爲八一身

種種謂形類多故二業因種種鈔第七受生稠林中攝爲二對謂初二次三後二其二對中皆初當

前七對因顯果後一約對後苦彰能生集就前七相論生後對因說生就初對中一身種種當相論生二業因種種對因辨生由業不同故生成種種

三任處種種四四五二句色想上下種種五同外

色因種種謂田等取外同喻故第二對三句中前

任處種種非唯六趣一趣之中無量處故四四五二句色想上下種種者今經二句爲論中一句經云有色無色差別相有想無想差別相二界有色無色界爲無色無想天爲無想餘皆有想而言上

下者。以無色為上。有色為下。無想為上。有想為下。應更有非想非非想。亦無想收而論。但云。色想上下。故遠公問云。無色云何得為色中上下。釋云。彼無粗色有細色。故又問。無想云何得為想中上下。答義同前。意云。彼無粗想有細想。故餘如初地中辨五同外色種種。即對因辨生以舉過業之因。顯有芽故。廣如六地。六自體種種名色與識俱生。相依不離。是報自體故。七本順生因種種。謂癡愛為本。順生求有。令有續故。第三對中。六自體種種。即當相論。生亦如六地。然有體唯名。有體唯色。有體具二。故云種種。七本順生下。即對因辨生。此上論文。謂癡愛下。疏順論釋。若遠公云。論中語。倒若正應云。順本生因。謂現在之生本因。癡愛。依今生上。還起癡愛。故云順本。亦不違理。八末後二句。集苦諦種種。謂三求不同。皆是集因。但集苦果。故云種種。上句顯欲有二求。欲受即欲求。貪

愛共取。追求不已故。欲生卽有求。愛生三有。自得
勝身。復攝眷屬。故言無始樂著者。顯上二求之過。
下句卽邪梵行求。由心取著故。不知三界輪迴。貪
求三界大小無量之相。妄謂涅槃。謂或拍腹爲道。
或計無想非想爲涅槃故。八末後下。約對後果彰
其生集。故名集苦諦。種
種。謂三求下。疏取論意。以爲解釋。論中先總釋論
名。後上句下。別消經文。先釋土句二求。言欲受者
受。卽樂受。欲生五欲。增取追求。招於當苦。言欲生
者。體卽是想。取三界勝相。而欲生故。下句卽邪梵
行求中。初總明此言輪迴。卽論往來上下。次貪求
三。界下別說。小卽欲界。大卽色界。無量卽空識二
無色。並如八地。妄謂涅槃。總相而說。或謂拍腹。卽
檀提婆羅門。拍腹唱言。我身卽道。是計欲界爲道。
無想卽計色界爲道。非想卽計無色界爲道。則上
二無色。亦在其中。二界偏舉。此二天者。外道多計

爲涅槃故。然論經云。貪著三界。想出想故。而論以無想。天釋經想字。意云。彼有細想。外道妄計以爲無想。有想謂無云。想出想。成實論中。亦謂無想。天但無粗想。而有細想。故論結云。外道妄計。謂出有輪。故知三求。但增集因。展轉招苦。

論欲受欲生者。於一切名色。常有欲受。有受故。卽有生也。愛爲生根。照心無體。卽境無所起。心境總無業體。便謝。唯普光智。無暗無明。卽無明滅。十二虛妄緣滅。唯法界無礙智。悲自在緣成也。

○第八釋習氣稠林

又知習氣種種相。所謂行不行差別相。隨趣熏習相。隨衆生行熏習相。隨業煩惱熏習相。善不善無記熏

習相隨入。後有熏習相。次第熏習相。不斷煩惱遠行。不捨熏習相。實非實熏習相。見聞親近聲聞獨覺菩薩如來熏習相。

〔疏〕亦先總後別。總云習氣。既通二義。不可局於羅

漢餘習。雖標習氣。別中皆言熏習。鈔初標章中。卽餘習熏習而爲

二義。標章通故。故唯識第二云。內種必由熏習生。長親能生果。是因緣。故外種熏習。或有或無。爲增

上緣。所辦成果。必以內種爲彼。因緣是共相。種所生果故。熏謂熏灼。如外香氣

習。謂習學。唯約有情。習必能熏。以成氣分。故云習

氣。卽賴耶識。以爲所熏。以恆住一類。是無記性。可

受熏。故前七轉識。以爲能熏。由有生滅。勢力增盛。

有增減故。能所共相和合。故名熏習。此如攝論及
唯識第二。若依起信。真如亦能內熏。佛善友等以
爲外熏。內外和合。以成氣分。前中雖聞教等。亦因
識能領受。故判識爲能熏。今竝通此。別中十種差
別。一與果現在非現在差別。謂過去善惡業因。與
今現果同起名行。不同起名不行。如人行施。今得
人身。亦常好施等。此卽因習。二隨趣熏者。道熏差
別。如從天來。今猶鮮淨。廣明道習。如大威燈光仙
人所問經。此卽果習。上二皆是對過說。今大威燈
光仙人
者。彼云。問疑經。此仙爲首。廣有問答。末後諸仙同
問此義。云衆生業持。猶如流星。各各別異。云何得

成真實聚集。下取意引佛言。無時方處而持得聚
集。過一乘已。若菩薩地中。方得聚集。無餘涅槃中
方得聚集。如百川歸海。又云。我雖說煩惱平等中
得聚集。亦非聚集。如風吹蟲聚在一處。風息還散。
眾生亦爾。業風吹聚。地獄餓鬼等處。業盡還散。又
問意云。先同在六道後人中相遇。云何得知先來
聚集。佛言。犬仙人所有眾生。若相見時。心不歡喜。
生嗔結恨。或時頭痛。或時失禁。大小便利。當知是
輩。已於先世地獄之中。曾聚集相。又問。若先世曾
在畜生中。百千萬身一處者。云何可知。佛言。彼生
人中。各相見時。結成瞋怨。常覓其便。我當何時覓
得其便。卽畜生中。曾聚集相。若餓鬼中來。常樂臭
穢。復多貪食。設欲與他。心不去離。生惱貪著。或復
見彼富貴勢力。心生嫉妬。復常欲得彼人財物。若
有先世同在人中。曾共一處者。於現世中。若相見
時。更生欲心。若有先世共在天中。若相見時。各以
眼道遠相攝取。共相眷愛。三隨眾生行者。親近
人聞此稱讚。如來是一切智。三隨眾生行者。親近
眾生熏差別。此是緣習。故宜遠惡近善。慎所習也。

所以昔王不立廡於寺而立之於屠。三隨衆生行

現望現在以說習氣所以昔王下。即智論文謂此

王有象。可以敵國。每有怨敵。莊嚴器仗無不尅勝

後敵國皆懼。久而無敵。遂於寺中立廡養之。久聞

僧衆禮念熏心。馴善成性。後有鄰國兵衆相侵。嚴

象敵之。都不肯敵。其王憂愁。慮其國敗。智臣白王

此象久處精舍。見聞善事。與之化矣。可處屠坊。令

常見殺後。未經久惡心。還起畜生尚。

爾。况復於人。近善不善。近惡不惡。

四隨業等者。

功業煩惱熏差別。功業者。釋經業字。謂是起作事

業。揀非業因。如鍛金之子。宜教數息等。煩惱習者。

如人喜眠。眠則滋多等。四隨業下。四五二句約因

說習。第四約於作業之因。

第五約於善惡之因。如鍛金之子等。明法品已引

莊嚴經論說。舍利弗。錯教弟子。一白骨觀。一數息

觀。經歷多年。各不得定。以是因緣。即生邪見。言無

涅槃。無漏之法。設其有者。我應得之。何以故。我能

善持所受戒故。我於爾時見是比丘。生邪見心。卽喚舍利弗而呵責之。汝不善教。云何乃爲是。二弟子顛倒說法。汝二弟子其性各異。一是浣衣。一是金師。金師之子。應教數息觀。浣衣之子。應教白骨觀。以汝錯教。令是二人。生於惡心。我於爾時爲是二人。如應說法。二人聞已。得羅漢果。是故我爲一切衆生。眞善知識。非舍利弗及目連也。釋曰。以此文證。明是工業之習。非業因也。業卽下善惡是耳。如人喜眠者。卽涅槃。十九大臣皆爲闍王。說此偈曰。若常愁苦。愁遂增長。如人喜眠。眠則滋多。貪嬌嗜酒。亦復如是。五善不善等者。善業等熏差別。此業卽是業因。以是善等三性。望來果稱業故。如久行施者。施心轉濃等。上三唯約現世。以明習氣。六隨入後有者。中陰熏差別。中有卽是本有後故。如梵行人。至中有內。亦無染欲。中有者。以經文隨入後有論判爲中陰熏故。故俱舍云。本

有謂滅前。居生剎那後則本有卽是今身。未至當
有於二中間。說爲中有俱舍云。滅生二有中。五蘊
名中。七次第者。與果次第熏差別。謂修善惡業。於
後有位諸趣之中。受果次第。習亦與果次第無差。
上二約現望後以說熏習。七次第等者。此言後有。卽當本有也。遠公釋次
第二云。中有能與生陰之果爲方便故。名爲次第。疏
意云。如在因中。先多作善。後則兼惡。後與果時。初
即多樂。後便有苦。先苦後樂。義亦準之。則受果時。
如因次第。上二約現者。第六現望中陰。第七現望
當。八不斷等者。離世間禪。因熏差別。謂諸無漏定。
名離世間禪。修學無漏。卽是彼因。由未斷煩惱。雖
修無漏。亦爲煩惱牽。煩惱隨至無漏。名爲遠行。行
亦入義。九實非實者。同法異外道行。解脫熏差別。

同法釋實。卽三乘同佛法故。異外道釋非實。在佛法外。故名爲異行者。上二之因。解脫者。上二之果。各有熏習。好習本法故。曾修小乘。今雖學大。先發小習。餘可準知。此卽邪正雙明。約修證說。亦含三乘餘習之相。九實非實下。後二約人亦含三乘者。去習氣故。在如人被縛。初得脫時。身猶不便。如罪陵伽罵恆河女。亦第二論。舍利弗瞋。亦當第二。謂身子爲上座。羅睺羅瘦。佛問其故。彼說偈云。若人食油則得力。若食酥者得好色。食麻滓者無氣力。大德世尊。自當知。佛問誰爲上座。答。和尚舍利弗。佛言。舍利弗。食不淨食。今日中炙。後復令止。不肯歸。已炙。不合止。佛遂引昔爲蛇傷王。呪師設火坑。令其軟毒。若不軟者。當入火坑。彼自思惟。我已能吐。云何更軟。遂投身入火。故其瞋習。至今不已。十其大迦葉舞。卽智論四十七餘。如第二疏抄。

乘熏差別。唯就於正約。其見聞故。法華安樂行。令不親近二乘。恐習成種故。

〔論〕見聞親近聲聞獨覺菩薩如來熏習相者。親近二乘。厭苦修空。捨大悲習。親近菩薩。修空破我。成大慈悲習。親近如來。成就根本普光明智。圓該法界。具普賢行習。

〔疏〕上來十種。前七約時。三世三有。互望明習。通於善惡。八明惡隨於善。後二約人。種種習氣。皆能了之。令成如來無習氣之習氣智故。

○第九釋三聚稠林

又知衆生正定邪定不定相。所謂正見正定相。邪見邪定相。二俱不定相。五逆邪定相。五根正定相。二俱不定相。八邪邪定相。正性正定相。更不作二俱離不定相。深著邪法邪定相。習行聖道正定相。二俱捨不定相。

疏亦先總後別論通爲五。總卽第一有涅槃法。無涅槃法。三乘中一向定差別。無卽邪定。有卽正定。各於自乘定故。離此不定。論畧不釋。此就種性約位以明。外凡無涅槃。三乘聖人定有。內凡不定。又約一期久遠。非究竟無者。鈔第九三聚林論通爲五約生成涅槃之果以

分。次。二偏就生成。成之因。後。二偏就涅槃。一善行惡行之因。又約一期下。揀法相宗無性之義。一善行惡行。因差別。此約解惑。以分三聚。謂正見是善行。因。邪見惡行。因。二見定起。二行。名之爲定。言二俱不定者。無正慧決擇。又不撥無因果。率之則可清升。任之則便鄙替。故曰不定。下不定。做此可知。故論皆不釋。三惡道善道。因差別。此約行業以辨。四外道聲聞。因差別。此約位以分。翻彼八正。名曰八邪。外道邪位定。正性離生。聖人位定。已入見道。故前三善根。則名不定。五菩薩差別。此約修大乘者得。失以分。著邪是失。所謂六蔽。聖道爲得。卽六度等。

論所謂正見正定相者。但正見卽有正定。正見者。思亡智現。正邪見盡。定亂總無。無得無證。無生無滅。名爲正見。心稱此理。名爲正定。反此有作有爲。卽爲邪定。習行聖道。正定相者。明修諸法空。無相。無性。無作。作者。名爲聖道。其心不與生滅和合。名爲正定。又修四聖諦。名爲聖道。修於八禪。入九次第定。名爲正定。九次第定者。名滅盡定。此滅定者。有四種滅定。一聲聞滅定。以四諦觀識心。滅現行煩惱。及智亦滅。二緣覺滅定。十二緣滅。現行煩惱滅。智亦滅。三權教菩薩。觀四諦。十二緣。明苦空。無

常無我無人無衆生壽者性相空寂都無所縛行
六波羅密生於淨土或以隨意生身住於娑婆或
言以慈悲畱惑住世設入寂定但隨無相理滅不
得法界大用滅故四如一乘菩薩依如來普光明
智發心但達根本無明是一切諸佛根本普光明
智以此大智以爲進修之體所有寂用皆隨智門
一身寂多身用多身寂一身用同身寂別身用別
身寂同身用如是同別寂用自在等空法界無礙
重重如海幢比丘是也。不同三乘以一切法空爲
進修十地之體或以無性之理爲十地之體是三

乘極果故。一俱捨不定相者。正邪俱捨。無定無亂。
方始應真。

青蓮庵等慧正信正容正宓正宣女弟
子王太淨魏招弟同刻
華嚴經十地品疏論纂要第七十一卷
伏願衆等慧眼肅清福山彌峻同遊華
藏之海共登法界之門仰報四恩均資
三有
康熙二十二年九月 日華藏室謹題

大方廣佛華嚴經疏論纂要卷第七十一